

CARTA JA NI NTEE SAN PABLO APOSTOL NUU NCHIVI ÑUU EFESO

1 ¹Maá nī cúu Pablo, apóstol Jesucristo, chi súcuán nī jētahān inī Yāā Dios nī ntají yā nduhū. De tée nī carta yáhá cuēē nūū ndá nú nchivī ñuū Efeso, jā cúu nú nchivī maá yā jā cándíja nú Cristo Jesús.

²De ñúhún inī ni jā Tatá ó Yāā Dios jíin Jētohō ō Jesucristo, ná sáhá cā yā jā váha ndá nú, de sáhá yā jā coo ndeé coo siī inī nū.

Jā sáhá Cristo jā quéndōo vāha ánō ō

³Ná cáhān ō jā cúñáhnú ndasí Yāā Dios, Yāā cúu Tatá Jētohō ō Jesucristo. Chi nī jēhe yā ndācá jā váha jā íyó andiví jā quéndōo vāha ánō ō, chi yíhí ó ndahá Cristo.

⁴Chi jondē ncháha ca jēcōo ñayiví de nī nacāji yā yóhó jā quivi ó ndahá Cristo, tácuā coo ndoo ánō ō de caca ndaā ō nūū yā.

⁵Ja nī ncundáhví inī yā yóhó jondē saá, de nī nchindetu yā yóhó jā naquehen yā yóhó jā coo ó sēhe yā. De jíin Jesucristo nī nsáhá yā súcuán, chi nī jētahān inī maá yā jā sáhá yā.

⁶De jā ñúcuán níní ná cáhān ō jā cúñáhnú ndasí yā, chi vāha ndasí nī nsáhá yā yóhó jíin ndācá jā váha inī yā, síquī jā yíhí ó ndahá Cristo, Sēhe yā jā mānī yā jíin.

⁷De síquī jā vāha ndasí inī Yāā Dios jíin ó, de Sēhe yā nī scácu yā yóhó jā ní jihí yā jēhē ō, de nī nee cáhnú inī yā nūū cuāchi ó.

⁸De nī stéhēn yā jā cúndáhví ndasí inī yā yóhó, de nī nsáhá yā jā jícūhun inī ō de cúndíchí ó jíin tūhun yā.

⁹De nī nsáhá yā jā cunī ō iin tūhun yā jā ní nchiyuhū, jāá nduú ní nsáhá yā jā cunī nchivī janahán. Chi súcuán ja nī ncundaā inī yā, de nī jētahān inī yā jā sáhá yā.

¹⁰De yáhá cúu tūhun jā ní ncundaā inī yā: Jondē tá quenda maá tiempo de sáhá yā jā ndihi jā íyó inī andiví jíin ñayiví, iin cáhnú-ni nduu, de quihi ndahá Cristo.

¹¹De síquī jā yíhí ó ndahá Cristo, de nīhīn ō tāhvī ō, chi ja nī nacāji Yāā Dios yóhó jondē jā xíhna ñúhún. Chi súcuán nī jani inī maá yā, chi sáhá yā ndācá-ni jā ní ncundaā inī yā jā jētahān inī yā sáhá yā.

¹²Súcuán nī nsāhá yā, tácuá ndá máá nī jā ní ncandíja Cristo xihna ñúhún, caca ndaā ni de súcuán de sāhá ñáhnú nī yā jā vii ndasí cúñáhnú yā.

¹³De saá-ni ndá ndóhó, nī jini nú tūhun ndāā tūhun vāha jā scácu yā ndóhó, de nī ncandíja nú Cristo. De nī nīhin ndá nú Espíritu Santo jā ní nquee yuhú yā jā cuāha yā. De ndéē Espíritu yā inī ánō nū, de cúu yā modo sello jā stéhēn jā cúu nú sēhe Yāā Dios.

¹⁴De sáhá yā jā íyó seguro inī ō jā cuéé cā de cuāha Yāā Dios tāhvī ō, jondē tá sínu yā tiñu jā scácu yā nchivī yā. De quivī ñúcuán cāhān ō jā cúñáhnú yā, chi vii ndasí cúñáhnú yā.

Jā jícān táhvī Pablo jēhē nchivī cándíja

¹⁵De nduhū nī jini nī tūhun nāsa cándíja ndá nú jā ní nsāhá Jētohō ō Jesús jēhē nū, jíin nāsa cúndáhvī inī nū ndihi nchivī jā yíhí ndahá Yāā Dios.

¹⁶De jā ñúcuán nduú jécuiñī ni jā nácuetáhvī nī jēhē ndá nú, de tá jícān táhvī ni de nduú náā inī ni ndá ndóhó.

¹⁷Chi jícān táhvī ni jā sáhá Yāā Dios jā jīcūhun vāha inī nū de cundíchí nú jíin tūhun yā, de cunī cā nū nāsa Yāā cúu yā. Chi maá yā cúu Yāā Dios Jētohō ō Jesucristo, de cúu yā Tatá ó jā vii ndasí cúñáhnú.

¹⁸De jícān táhvī ni jā nastúu cā yā inī jāá ntúnī ndá nú, tácuá jīcūhun inī nū nāsa cáá ndihi jā ñúhún inī nū jā nīhin nū síqui jā ní ncana yā ndóhó. De jīcūhun inī nū nāsa cúcuicá nú jíin ndācá tūhun ñáhnú tūhun vii jā ndíso tūhun yā jā cúu nchivī maá yā.

¹⁹De jícān táhvī ni jā jīcūhun inī ndá nú nāsa cúñáhnú ndasí poder yā jā sátíñú yā inī ánō ō jā cúu ó nchivī cándíja. Chi nduú ndíhi cuitī poder yā.

²⁰De poder ñúcuán cúu jā ní stéhēn yā tá nī nastécū yā Cristo māhñú ndīyi, de nī ntenee yā Cristo lado cuáhá yā jondē andiví.

²¹De nī jani yā Cristo síqui ndācá jā cúñáhnú, jíin jā ndíso tíñú, jíin jā tíin poder, jíin jā tátúnī, jíin síqui ndācá jā cāhān nchivī jā cúñáhnú, cúu tiempo mitan, cúu tiempo jā quiji.

²²De nī nsāhá yā jā tíin nīhin Cristo ndācá jā íyó. De nī nsāhá yā jā maá Cristo cúñáhnú nū nchivī cándíja.

²³De nchivī cándíja cúu ji tá cúu yiqui cúñu yā, chi iin-ni cā cúu ji jíin yā, de cúnuú yā inī ánō ji, chi Yāā jā ñúhún chitú ní cáhnú-ni cúu yā.

Nī ncācu ó síqui jā ní ncundáhvī inī yā yóhó

2 ¹De nī nsāhá yā jā cutecū ndá nú ní cání jíin Cristo. Chi ja nī ncuu ndá nú modo ndīyi nū yā, nī nsāhá cuāchi nú jíin tiñu néhén jā ní nsāhá nú.

²Chi nī jica ndá nú jíin tiñu ñúcuán jondē saá, tá nī niquīn nū tiñu nchivī ñayiví, tá nī jetáhvī nú nū tāchī cúñáhnú jā ndácu tiñu nū ndá cā tāchī,

de jíca nūū táchī. De suu cúu jā scándā inī nchivī jā íyó nīhin inī nūū Yāā Dios.

³De ndá máá nī suni sūcuán nī jica nī, chi nī nsāhá nī tiñu néhén jā cúnī maá nī, jíin ndācá jā jícan yiqui cúñu nī, jíin jā jáni néhén inī ni jondē saá. Jā ñúcuán suni nī ncuu nī nchivī jā nīhin castigo xēen jā cuāha yā nícu, chi inuú nī nsāhá nī tá cúu nūū sáhá ndá máá ji.

⁴De Yāā Dios chi cuāhā ndasí nī ncundáhvi inī yā yóhó, de vāha ndasí inī yā jíin ó.

⁵De tá nī ncuu ó modo ndīyi nūū yā jā ní nsāhá cuāchi ó, de nī nastécū yā yóhó jā cutecū ō ní cánī jíin Cristo. Chi síquī jā vāha ndasí inī yā cúu jā ní scácu yā yóhó.

⁶De nī nastécū yā yóhó jā cutecū inuú ó jíin Cristo Jesús, de tenee yā yóhó jíin yā jondē andiví.

⁷Súcuán nī nsāhá yā tácuā ní cā tiempo jā quiiji de stéhēn yā nāsa mānī ndasí yā jíin ó, jíin nāsa vāha inī yā jíin ó jā síquī Cristo Jesús.

⁸Chi síquī jā mānī ndasí yā jíin ndá nú cúu jā ní scácu yā ndóhó, chi nī ncandíja ndá nú jā sáhá yā jēhē nū. De nsūú síquī jā ní nsāhá ndá máá nú cúu, chi tāhvi jā ní jēhe yā nūū nū cúu.

⁹Chi nduú nā tiñu vāha ní nsāhá ó jā scácu yā yóhó, de jā ñúcuán ni iin ó mā cūú sáhá téyíí ó maá ó jā cuu scácu ó maá ó.

¹⁰Chi cúu ó iin tiñu viī jā ní nsāhá maá yā, chi nī nasāhá yā yóhó jā íyó inuú ó jíin Cristo Jesús, tácuā sáhá ó ndācá tiñu vāha jā ja nī nsāhá tūha Yāā Dios jā sáhá ó.

Jā sáhá Cristo jā ndívi ó nūū tūhun jā mānī Yāā Dios jíin ó

¹¹Túsaá de nūcūhun inī ndá nú nāsa nchivī nī ncuu nú jondē saá. Chi nduú ní ncúu nú nchivī hebreo, chi sa nī ncuu nú nchivī ndācá nación jāá nduú jíinī tūhun yā. De nchivī hebreo jā sáhá circuncidar yiqui cúñu, nī ncāhān ji jā cúu nú nchivī jāá nduú sáhá circuncidar.

¹²De nūcūhun inī nū jā jondē saá de nduú ní íyo ndá nú jíin Cristo, de nī ncuu nú nchivī ñūū jíicá nūū nación Israel. De nduú ní jíinī ndá nú ndācá tūhun contrato jā ní nquee yuhú Yāā Dios jā sáhá yā. De nduú ní íyo Yāā Dios jíin nú ñayiví yáhá, de nduú nā jā vāha ní ñúhun inī ndá nú jā coo.

¹³De mitan chi nī ndívi ndá nú nūū Yāā Dios jāá nduú ní jíinī nū tūhun yā jondē saá, chi nī nquivi nú ndahá Cristo síquī jā ní jíhī yā jēhē nū.

¹⁴De Cristo cúu Yāā jā sáhá jā ndúmanī tāhán ó. Chi nī nsāhá yā jā nchivī hebreo jíin nchivī ndá cā nación, iin-ni cā nī nduu ó nūū yā. Chi nī nsāhá yā jāá nduú cā jíinī ūhvi tāhán ó, de suu cúu modo jā ní janī yā iin jā ní ndasí sava māhñú ó jā ní nsāhá síin yóhó.

15 Chi nī nsōcō yā maá yā nī jihī yā, de sūcuán nī sndáhvā yā ley janahán jíin tūhun jā ndácu tiñu jíin jā tátúnī jā ndíso maá. Chi ley ñúcuán nī nsāhá síin nchivī hebreo jíin ndá cā nación jāá nduú ní jíinī ji ley. De nī nasquetáhán yā ndihi ó jā ní nduu ó iin-ni cā nación jeé, de yíhí ó ndahá yā. De sūcuán nī nsāhá yā jā ní ndumanī tāhán ó.

16 De jíin jā ní jihī yā yicā cruz, de nī snāā yā tūhun jā jíinī ūhvi tāhán nchivī hebreo jíin ndá cā nación. De nī nsāhá yā jā ní ndivi ó nūū tūhun jā mānī Yāā Dios jíin ó, de nī nduu ó iin-ni cā nchivī maá yā.

17 Chi nī nquiji Cristo nī nacani yā tūhun vāha nūū ndācā nchivī jā ná ndívi ji nūū tūhun jā mānī yā jíin ji, cúu ndá ndóhó nchivī jāá nduú ní jíinī tūhun yā, de saá-ni nchivī hebreo jā jíinī tūhun yā.

18 De mitan de síquī jā ní jihī Cristo, de ndihi ó, cúu nchivī hebreo á nchivī ndá cā nación, cuu quívi ó nūū Tatá ó Yāā Dios, de iin-ni Espíritu Santo sáhá.

19 Túsaá de nduú cā cúu ndá nú tá cúu nchivī ñuū jíicá ni nchivī tátū, chi iin-ni cā nī nduu nú jíin ndá nchivī ñuū maá yā. De táhán nchivī vehe Yāā Dios cúu ndá nú.

20 De cúu ndá nú tá cúu iin iin parte iin vehe cáhnú jā cúvāha síquī cimientu, de cimientu ñúcuán cúu tūhun Cristo jā ní nacani ndá apóstol jíin ndá tēe jā ní nacani tūhun yā janahán. De maá Jesucristo cúu tá cúu iin yūū jā cánuú cā jā yítuu squínā vehe.

21 De ní vehe cúvāha vāha síquī maá yā, de cúsúcún cuāhān, de cúu iin templo īī jā ndéē maá Jētohō ō.

22 De suu cúu ndá máá nú, chi íyó inuú nú jíin Cristo, de inuú-ni sámā yā ndóhó jíin ndá cā nchivī cándíja jā cúu ndá nú modo iin iin yūū templo. De suu cúu jā ndéē Espíritu Yāā Dios inī nū modo inī iin templo.

**Jā ndíso tíñú Pablo jā nacani dē tūhun nūū
nchivī jāá nduú jíinī tūhun Yāā Dios**

3 **1** De jā ñúcuán nduhū Pablo, jíicān táhvī ni nūū yā. De yíhí nī vecāa síquī jā ní nacani nī tūhun Cristo Jesús nūū ndá ndóhó nchivī ndācā nación jāá nduú ní jíinī tūhun yā nícu.

2 De jíinī ni jā ní jini ndá nú tūhun nāsa vāha ndasí nī nsāhá Yāā Dios jíin nī, chi nī jēhe yā tiñu nūū ni jā nacani nī tūhun vāha yā nūū nū.

3 De tūhun yā jā ní nchiyuhū, nī nastúu yā nūū ni, tá cúu nūū ja nī ntee nī jacū síquī ñúcuán nūū nū.

4 De tá cahvi nú de cuu jíicūhun inī nū jā ní jíinī vāha nī tūhun Cristo jā ní nchiyuhū.

5 De nduú ní stéhēn yā tūhun yuhū ñúcuán nūū ni iin nchivī ndācā cuiyā yātā. De mitan cúu jā stéhēn nijin yā jíin Espíritu yā nūū ndá apóstol jā ní jani ndoo yā, jíin nūū ndá tēe nacani tūhun yā.

⁶De súcuán cáhān tūhun jā ní nchiyuhū ñúcuán: Nchivī ndá cā nación iin cáhnú-ni nīhīn ji tāhvī ji jíin nchivī hebreo, chi nī ncandíja ji tūhun jā scácu yā ji. De inuú-ni nī nduu ndihi ji, de iin cáhnú-ni quéndōo ndetū ánō ji sáhá Cristo, tá cúu nūú ní nquee yuhú Yāā Dios.

⁷De jā síquī tūhun yáhá cúu jā ní jani yā nduhū jā nácani nī tūhun nūú ndá nú. Chi nī ncutahvī ni tiñu vāha ndasí yáhá jā ní jēhe yā nūú ni. De jíin poder yā nī nsāhá yā ñúcuán jíin nī.

⁸De nduhū chi cúu nī tēe jā núu cā nūú ndācá nchivī jā núu cā jā yíhí ndahá yā. De vísō súcuán cúu nī, de nūú maá nī nī jēhe yā tiñu vāha ndasí yáhá jā nácani nī tūhun vāha yā nūú nchivī ndācá nación jāá nduú jíinī, nāsa cuícá ndasí ó ndihi jā ndíso tūhun Cristo, jā má quéndá cuitī ō jīcūhun inī ō.

⁹Chi nī jani yā nduhū jā stēhēn cājí nī nūú ndihi nchivī jā scácu yā ji. De ñúcuán cúu tūhun Yāā Dios jā ní nchiyuhū jondē janahán ndasí, chi maá yā nī nsāhá ndihi-ni.

¹⁰De súcuán nī nsāhá yā jíin nchivī, tácuā mitan de ndācá jā cúñáhnú jíin jā ndíso tíñú nūú sūcún, ná cúnī nāsa ndíchí ndasí Yāā Dios. Chi ndíchí ndasí nī nsāhá yā jíin nchivī cándíja.

¹¹Chi súcuán nī ncundaā inī yā jondē níí cání, de nī nsāhá yā jā maá Jētohō ō Cristo Jesús nī squíncuu yā ñúcuán.

¹²De síquī jā ní nsāhá Cristo, de mitan de cūndeé cúcáhnú inī ō jā cuu quívi ó cáhān ō jíin Yāā Dios síquī jā cándíja ó Cristo.

¹³Túsaá de cáhān ndāhvī nī jíin ndá nú jā má cúcuécá inī nū síquī tūndóhó jā ndóho nī jēhe nū. Chi suu sáhá jā quéndōo ndetū ánō ndá nú.

Cristo cúndáhvī ndasí inī yā yóhó

¹⁴De jā ñúcuán cúu jā jécuiñī jítí nī nūú maá Yāā jā cúu Tatá Jētohō ō Jesucristo.

¹⁵De maá yā cúu Tatá nūú ndihi nchivī yā jā ndéē andiví jíin ñayiví.

¹⁶De jícān táhvī ni jā jíin poder yā jā cúñáhnú ndasí yā, ná sáhá yā jā cuja vāha inī ndá nú jíin tūhun yā, de coo fuerza inī ánō nū, sāhá Espíritu yā.

¹⁷De suni jícān ni jā candíja nīhīn ndá nú Cristo, tácuā cundeē yā inī ánō nū, de tiin vāha nú tūhun jā cúndáhvī inī yā ndóhó, de cuiñī nīhīn nú jíin.

¹⁸De súcuán de cuu jīcūhun vāha inī nū jíin ndācá nchivī cándíja, nāsa íyó tūhun jā cúndáhvī inī Cristo yóhó. Chi ndasí jítē, cání, cúnú, sūcún tūhun ñúcuán, chi cuāhā ndasí sáhá.

¹⁹Túsaá de jícān ni jā ná cúnī vāha ndá nú nāsa cúndáhvī inī yā yóhó, vísō nduú cúu cuitī jīcūhun inī ō ndihi ndihi. De súcuán de coo inuú nú jíin Yāā Dios jā cunuú yā inī ánō nū.

²⁰Túsaá de ná cáhān ō jā vii ndasí cúñáhnú yā, chi maá yā cúu Yāā jā íyó poder jā sáhá yā jā váha ndasí cā nsúú cā ndihi jā jícān ō á jā jáni inī ō. De sáhá yā ñúcuán jíin poder yā jā sátíñú inī ánō ō.

²¹De ná cáhān ō jā vii ndasí cúñáhnú yā jā síquī jā ní nsáhá yā jēhē nchivī cándíja jíin jā síquī Cristo Jesús. De súcuán ná cóo jondē ní cání cuiti tiempo jā quiji. Amén.

Jā ní nduu inuú ndá nchivī cándíja sáhá Espíritu

4 ¹De nduhū jā yíhí nī vecāa síquī tūhun maá Jētohō ō, cáhān ndāhvī nī jíin ndá nú jā ná cáca ndaā nū tá cúu nū cānuú caca nú jā cúu nú nchivī jā ní ncana yā.

²De níní coo suchí inī nū, de coo vitá inī nū. De coo paciencia nū, de cuandee inī nū jíin táhān nú jā cúndáhvī inī nū ji.

³De cundihvī inī nū jā cundeē mānī inuú nú, sáhá maá Espíritu Santo nū vāji tūhun mānī inī.

⁴Chi iin-ni cúu ndá nchivī maá yā, de íyó iin-ni Espíritu, de inuú ñúhún inī ō jā coo jā váha síquī jā ní ncana yā yóhó.

⁵De íyó iin-ni Jētohō ō, jíin iin-ni tūhun cándíja ó, jíin iin-ni tūhun jénduté ó.

⁶De íyó iin-ni Yāā Dios jā cúu Tatá ndācá ó. De maá yā cúñáhnú nū ndihi ó, de sátíñú yā jíin ndihi ó, de ndēē yā inī ndihi ó.

⁷De tá iin iin ó nī ncutahvī ō síin síin tiñu jā sáhá ó, tú nāsa medida nī jēhe Cristo ndá tāhvī nū ō.

⁸Jā ñúcuán cúu jā cáhān tutū īi:

Tá nī ndaa yā cuānohōn yā andiví, de nī nastútú yā cuāhā jā yíndasī, cuāhān yā jíin.

De nī nsajī yā tāhvī nū ndācá nchivī.

⁹De jā cáhān tutū jā ní ndaa yā, de suu cáhān jā xihna cā ichi andiví nī ncuun yā jondē nū cūnú cā ñayiví yáhá.

¹⁰De Yāā jā ní ncuun, suni maá yā cúu jā ní ndaa jondē nū sūcún cā andiví, tácuā cuhun chitú yā níí cáhnú-ni.

¹¹De nī jēhe yā síin síin tiñu jā sáhá nchivī. Chi nī jani yā sava nchivī cuu apóstol, de sava cā nacani tūhun yā, de sava cā scándíja nchivī tūhun jā scácu yā ji, de sava cā cuu pastor jā coto nchivī cándíja, de sava cā stéhēn.

¹²Súcuán nī jani yā nchivī maá yā jā sáhá ji tiñu cūnī yā, tácuā cuahnu cā nchivī Cristo jíin tūhun yā.

¹³De súcuán coo jondē nduu inuú-ni ndihi ó jíin tūhun cándíja ó, de cunī váha ó nāsa Yāā cúu Sēhe Yāā Dios. De súcuán cuja váha ó jondē chitú inī ō jíin ndihi tūhun jā ñúhún chitú inī Cristo.

14 De súcuán de mā cūú cā ō modo sūchí lúlí jā ñamā jáni yáhá jáni ñúcuán iní ji, ni mā quívi nduū ō cháhá chúcuán jíin síin síin tūhun jā stéhēn ndá tēe stáhví jā ndito ndasí dē squívi dē yóhó nū tūhun stáhví.

15 Chi sa ná cúniquín ō tūhun ndāā jíin tūhun cúndáhví iní. De súcuán de cuahnu ó jíin ndācá tiñu jā cúnī Cristo, Yāā jā cúñáhnú nū nchiví jā cúu modo yiqui cúñu yā, chi iin-ni cā cúu ji jíin yā.

16 De sáhá yā jā nduu inuú-ni ndācá ji jā jíja ji cuāhān ji, chi cúu ji modo iin-ni cā yiqui cúñu jíin yā. De jétíñú vāha tá iin iin ji nāsa nī nīhīn tíñú ji, tácuā scuáhnu táhān de cuja ndá ji jíin tūhun cúndáhví iní.

Jā ndújeé ó sáhá Cristo

17 Túsaá de yáhá cúu tūhun jā cáhān ni jíin ndá nú, de jā cáchi maá Jētohō ō cúu jā cáhān nīhīn nī jíin nú: Jā má cācá cā nū tá cúu nū jíca sava nchiví jāā nduú jíin ji nāsa Yāā cúu Yāā Dios, chi jíca ji jíin tūhun jā jáni cāhá iní maá ji.

18 De íyó neē jāá ntúnī ji, de nduú névāha ji Espíritu jā vāji nū Yāā Dios, chi nduú jíin ji tūhun yā, sīquí jā nīhīn iní ji.

19 De nduú cā cúcanoō ji, chi nī nquívi ji jíin tiñu néhēn ndasí, de ndíhví iní ji sáhá ji ndācá tiñu téhēn.

20 Sochi ndá ndóhó, chi nsūú súcuán nī scuáha nú tūhun Cristo,

21 de tú ndāā jā ní jini ndá nú tūhun yā jíin jā ní ncutūha nú jíin tūhun ndāā Jesús.

22 Túsaá de sndóo nú ndācá tiñu jā ní nsāhá nú ichi chátā, tá nī nsāhá ndá nú modo jā cúnī maá nú jā ní ncutéhēn ánō nū nī nsāhá tiñu néhēn tiñu stáhví jā ní ndíyo iní nū.

23 De ná ndújeé ánō nū jíin jāá ntúnī nū.

24 De cuāha ndá nú tūhun jā ndujeé nú, chi nasāhá Yāā Dios ndóhó tá cúu nū cúnī maá yā jā caca ndāā nū jíin tiñu váha tiñu ndoo.

25 Túsaá de mā cáhān cā nū tūhun stáhví, de sa cáhān ndāā nū jíin ndācá táhān nú, chi iin-ni cā cúu ndihi ó.

26 Tú vāji iin jā squítī iní ndóhó, de mā quítī xēēn iní nū cuāhā hora.

27 Chi mā cuáha nú tūhun jā súcuán squívi tāchī cúñáhnú ndóhó nū cuáchi.

28 De nchiví jā ní nsacuíhná, mā sácuíhná cā ji, chi sa satíñú ji, de cucuu ji jíin tiñu váha, tácuā nīhīn ji jā cuāha ji nū nchiví jā cúmanī nū.

29 Ni iin tūhun néhēn mā cáhān ndá nú, chi sa cáhān nū tūhun vāha jā scuáhnu táhān jíin tūhun yā, de sáhá jā quéndōo vāha nchiví jā jíni.

30 Mā sáhá ndá nú cuāchi tácuā mā cúcuécá iní Espíritu Santo Yāā Dios. Chi Espíritu yā cúu tá cúu sello jā stéhēn jā cúu nú sēhe Yāā Dios, jondē quiji quívi jā jínu tiñu jā scácu yā ndá nú.

³¹De siáā ndá nú ndācá tūhun jā cútucu inī, jíin tūhun xēen inī, jíin tūhun quítī inī, jíin tūhun cáhān nāvāha, jíin ndācá tūhun nēhén.

³²Chi sa coo vāha inī nū jíin táhán nú, de cundáhví inī nū ji. De cune cáhnú inī ndá nú nūū táhán nú, tá cúu nūū ní nee cáhnú inī Yāā Dios nūū nū jā ní nsāhá yā jíin Cristo.

Nāsa cánuú caca ndaā sēhe Yāā Dios

5 ¹Túsaá de ndacu ndá nú Yāā Dios, chi cúu ndá nú sēhe yā jā mānī yā jíin.

²De níiní cundáhví inī nū táhán nú, tá cúu nūū ní ncundáhví inī Cristo yóhó, de nī nsōcō yā maá yā jēhē ō, nī ncuu yā tá cúu iin ticāchí jā jēhēn āsīn nūū Yāā Dios jā ní nsōcō yā maá yā.

³De mitan jā cúu ndá nú sēhe Yāā Dios, de nī mā sāhá nú de nī mā nátúhún nú sīquī tiñu ndiī, nī sīquī ndācá tiñu téhén, nī sīquī tiñu ndíyo inī ndatíñú.

⁴De nī mā cáhān nū ndācá tūhun jā sáhá jā cúcanoō táhán, nī tūhun naā, nī tūhun jāá nduú jétíñú cuitī. Chi ndācá ñúcuán nduú níhīn tiñú. Chi sa nacuetáhví nú nūū Yāā Dios.

⁵Chi ja jíiní ndá nú jā nī iin nchivī jā jíca ndiī, nī jā sáhá tiñu téhén, nī jā ndíyo inī ndatíñú, mā níhīn táhví ji quívi ji ndahá Cristo jíin Yāā Dios jā tatúni yā nūū ji. Chi ndācá jā ndíyo inī ji cúu tá cúu ídolo ji jā chíñúhún ji.

⁶De coto ndá nú jā má stáhví nī iin ji ndóhó jíin ndācá tūhun jā cáhān cáhá ji-ni, chi sīquī ndá tūhun nēhén yáhá cúu jā quíji castigo xēen Yāā Dios nūū ndá nchivī jā níhīn inī.

⁷Mā quívi nduū nū jíin ji túsaá.

⁸Chi ndá quívi yātā nī iyo ndá nú tá cúu nūū neē, de mitan chi íyó nú jíin luz maá Jētohō ō, cúu jā jícūhun inī nū sīquī yā. De caca nú tá cúu nūū jíca nchivī jā túu luz yā inī ánō ji.

⁹Chi tú íyó ó jíin luz yā de sáhá ó tiñu mānī inī, tiñu ndāā, jíin tiñu váha.

¹⁰Scuáha ndá nú sāhá nú ndācá tiñu jā jétahān inī maá Jētohō ō.

¹¹De mā quívi nduū nū jíin ndācá jāá nduú níhīn tiñú jā sáhá nchivī jā íyó nūū neē. Chi sa stéhēn nū nūū ji tūhun ndāā.

¹²Chi cúcanoō ō cáhān ō sīquī tiñu jā sáhá yuhū ndá ji.

¹³De luz yā sáhá jā nátūu ndācá tiñu nēhén jā sáhá ji. Sochi tú cuetáhví ji luz yā de caca ji jíin luz.

¹⁴Jā ñúcuán cáhān tutū:

Ndóhó jā cúhuun inī, jā modo jā quíxīn nū, nacōo,
de quee nú māhñú nchivī jā cúu modo ndíyi.

De Cristo stúu yā luz yā inī ánō nū.

Cáchī tutū.

15Túsaá de coto vāha ndá nú nāsa caca ndaā nū. De mā cācá nú tá cúu nūū jíca ndá tēe naā xīnī, chi sa caca nú tá cúu nūū jíca ndá tēe ndíchí.

16Mā snāā nū tiempo, chi cundihví inī nū jín tiñu yā, chi íyó cuāhā cuāchi ndá quīvī yáhá.

17Túsaá de mā cōó naā xīnī nū, chi sa jīcūhun vāha inī nū nā tiñu jétahān inī maá Jētohō ō.

18De mā jínī nú, chi tīvī nú sāhá. Chi sa nducú nú jā cunuú Espíritu Santo inī ánō nū.

19De cāhān ndá nú jín táhán nú jín salmo jín himno, yaā īī jā cāhān tūhun yā. De inī ánō nū cāhān nū jín yā jín ndācá yaā, chi ñúcuán cúu jā jíta ánō nū nūū yā jā chíñúhún nú yā.

20De nínī nacuetáhvī nú sīquī ndācá-ni nūū Tatá ó Yāā Dios de nacunehen nú sívī maá Jētohō ō Jesucristo.

Nāsa squíncuu vāha nchivī cándíja nūū táhán ji

21De cuetáhvī ndá nú nūū táhán nú sīquī jā íyó yíñúhún nú nūū Cristo.

22Ndá ndóhó ñahan jā cúu ñasíhí, cuetáhvī nú nūū yíí nú, tá cúu nūū jétáhvī nú nūū maá Jētohō ō.

23Chi yíí cúñáhnú nūū ñasíhí, tá cúu nūū cúñáhnú Cristo nūū yóhó nchivī cándíja. De maá yā scácu yā yóhó, jā cúu ó tá cúu yiqui cúñu yā, chi iin-ni cā cúu ó jín yā.

24De tá cúu nūū jétáhvī nchivī cándíja nūū Cristo, suni sūcuán cánuú jā cuetáhvī ñasíhí ndihi jā cāhān yíí ña.

25De ndá ndóhó tēe cúu yíí, cundáhvī inī nū ñasíhí nú, tá cúu nūū ní ncundáhvī inī Cristo yóhó nchivī cándíja, de nī nsōcō yā maá yā jēhē ō.

26Súcuán nī nsāhá yā tácu coo ndoo coo īī ō nūū yā, de nī naquete yā ánō ō jín tūhun yā jín jā ní jenduté ó.

27De yóhó nchivī cándíja chi cuiñi ó nūū yā, de viī cuñáhnú ó. De mā cúndeē cuāchi ánō ō, de ni iin jāá nduú viī, de ni iin jā sūcuán, chi sa coo ndoo coo īī ō nūū yā, de nduú nā cuá cumanī cā.

28De tá cúu nūū ní ncundáhvī inī Cristo nchivī cándíja, suni sūcuán cánuú jā cundáhvī inī yíí ñasíhí dē, tá cúu nūū cúndáhvī inī dē maá dē. Chi tēe jā cúndáhvī inī dē ñasíhí dē, maá dē cúu jā cúndáhvī inī dē.

29Chi ni iin tēe nduú jínī ūhvī dē maá dē, chi sa scájī dē maá dē de jító vāha dē maá dē. De suni sūcuán sáhá Cristo jín yóhó nchivī cándíja nūū yā.

30Chi cúu ó tá cúu yiqui cúñu yā, de iin iin ó cúu tá cúu iin iin parte yiqui cúñu yā.

31De suu cúu tá cúu tēe jā sndóo dē tatá dē naná dē, de quétáhán dē jín ñasíhí dē, de iin-ni cā cúu ndúū dē.

³²Cúñáhnú ndasí tūhun yuhū yáhá, de cáhān ni jā nchivī cándíja suni súcuán quétáhán ji jíin Cristo.

³³De suni súcuán cánuú jā tá iin iin nú cundáhví inī nū ñasíhí nú, tá cúu nū cundáhví inī nū maá nú. De ñasíhí ná cóo yíñúhún ña jíin yíí ña.

6 ¹De ndá ndóhó sēhe, candíja nú nūū tatá nú nūū naná nú, chi súcuán cúu jā sáhá vāha nú jā cándíja nú Jētohō ō.

²Chi yáhá cúu iin táhán jā úxī tūhun jā ndácu tiñu jā ní jēhe yā, de xihna cā tūhun yáhá cúu jā ndíso tāhvī: Coó yíñúhún nú nūū tatá nú nūū naná nú,

³tácua quendōo ndetū nū, de náhán cutecū nū inī ñayiví, cáchī.

⁴De ndá ndóhó tatá, mā squítī inī nū sēhe nú, chi sa scuáhnu nú ji jíin tūhun jā cuetáhví ji, de stéhēn nū nūū ji jā candíja ji maá Jētohō ō.

⁵De ndá ndóhó mozo, squíncuu nú nūū patrón nū ñayiví yáhá, de coo yíñúhún nú de cundihví inī nū jā má stíví nú nūū dē. De ndāā de vāha satíñú nú, de canī inī nū jā nūū Cristo satíñú nú.

⁶Mā satíñú vixī nū maá hora jā jíinī dē tácua cuetúhún dē ndóhó. Chi sa sáhá ndá nú cuenta jā mozo Cristo cúu nú. De sáhá nú jā jétahān inī Yāā Dios jondē jíin inī jíin ánō nū.

⁷De cusī inī nū jā satíñú nú, de canī inī nū jā nūū maá Jētohō ō satíñú nú, nsūú nūū nchivī.

⁸Chi ja jíinī ndá nú jā tiñu vāha jā sáhá iin iin nú, de nīhīn nū yāhvi sīquī tiñu ñúcuán nūū maá Jētohō ō, vísō cúu nú mozo á tēe jā satíñú maá.

⁹De ndá ndóhó patrón, suni súcuán sáhá nú jíin mozo nū, de mā cáhān xēēn nū jíin ji. Chi nūcūhun inī nū jā suni maá nú jíin maá ji yíhí nú ndahá Jētohō ō, Yāā jā ndēē andiví. De nduú sáhá yā cuenta nāsa cúu iin iin nchivī, chi inuú sáhá yā jíin ji.

Jā ná cúcutú ó jíin ndācá fuerza Yāā Dios

¹⁰De íyó incā tūhun, hermano. Nducú ndá nú jā ná cóo fuerza inī nū jíin fuerza maá Jētohō ō jā íyó inuú ndá nú jíin yā, chi íyó ndasí poder yā.

¹¹De cucutú nú jíin ndācá fuerza Yāā Dios, tácua cuu cuiñi nīhin nú jā má stáhví tāchī cúñáhnú ndóhó.

¹²Chi modo jā cánāá ó jíin ndācá jānēhén. De nsūú nchivī cúu jā cánāá ó jíin, chi sa jíin ndācá tāchī jā jíca nūū sūcún. De ñúcuán cúu ndá jā cúñáhnú, jíin jā ndíso tíñú, jíin jā tátúnī nūū nchivī ñayiví yáhá jā jíca ji nūū neē.

¹³Túsaá de cucutú ndá nú jíin ndihi fuerza Yāā Dios, tácua cuu cuiñi nīhin nú quivī jā coto túnī tāchī ndá nú. De súcuán coo tūha nú jíin ndācá ndihi jā cuiñi nīhin nú jíin.

14Túsaá de cuiñi nihin nú jín tūhun ndāā jā cúu tá cúu jā yíhí cutú cinturón chíjin nú. De sacutú nú maá nú jín tūhun jā caca ndāā nū, de ñúcuán cúu modo jā cúcutú soldado jín sahma cāa jā ndási dē.

15De níní coo tūha ndá nú jā nacani nú tūhun ndeé tūhun sīi inī jā váji nūū Yāā Dios. De ñúcuán cúu modo jā chíhi soldado zapato jēhē dē.

16De jā cánuú cā cúu jā candíja nú jā íyó yā jín nú. De ñúcuán cúu tá cúu jā jási nū maá nú jín iin escudo. Chi jín tūhun jā cándíja nú ñúcuán, de cuu sndáhvā nū ndihi jā tájí maá tāchī cúñáhnú, jā cúu tá cúu flecha jā cáyū yáñuhūn punta.

17De cuiñi ndá nú jín tūhun jā ní scácu yā ndóhó, jā cúu tá cúu iin xiní cāa. De cuetínú nú tūhun jā yósō nūū tutū Yāā Dios jā ní jēhe Espíritu Santo nūū nū. Chi ñúcuán cúu modo jā jétínú soldado espada dē.

18De níní cācān táhvī nū nūū Yāā Dios síquī ndihi-ni, de cāhān ndāhvī nú jín yā jín fuerza Espíritu. Túsaá de ndito coo inī nū, de mā jécuiñi nū jā cācān táhvī nū jēhē ndācā nchivī maá yā.

19De suni cāhān nū jēhē ni, tácuā nihīn ni tūhun jā cāhān ni, de coo téyíi inī ni jā nacani cájí nī tūhun jā ní nchiyuhū jā scácu yā nchivī.

20Chi nī ntetínú yā nduhū jā jíca nī nācani nī tūhun ñúcuán, de jā síquī ñúcuán cúu jā yíhí nī vecāa. De cācān táhvī ndá nú jā coo téyíi inī ni cāhān ni tūhun yā, tá cúu nūū cánuú jā cāhān ni.

Saludo jā sándihí

21Tíquico cúu iin hermano jā mānī ō jín, de cúu dē tēe squíncuu vāha jā chíndeé táhān jín nī nūū tiñu maá Jētohō ō. De maá dē cachī tūhun ndihi nāsa cuáhān tiñu nī de nāsa íyó nī.

22Jā ñúcuán nī ntají nī dē cuēē dē nūū nū, tácuā cachī dē nāsa íyó ndá nī, de coo ndeé inī ndá nú sáhá dē.

23De ñúhún inī ni jā Tatá ó Yāā Dios jín Jētohō ō Jesucristo, ná sáhá yā jā coo ndeé coo sīi inī ndācā nú jā cúu nú hermano, de coo manī cā nū jín yā, de candíja nihin nú.

24De ñúhún inī ni jā ná sáhá cā yā jā váha ndá nú jā mānī ndija nú jín Jētohō ō Jesucristo. Súcuán ná cóo. Amén.